

Premium Insurans Am Naik 6.4 Peratus Kepada RM16.2 Bilion Pada 2013

Bernama

2 Apr, 2014

KUALA LUMPUR, 2 April (Bernama) -- Industri insurans am mencatatkan pertumbuhan sebanyak 6.4 peratus dalam premium bertulis kasar kepada RM16.2 bilion pada tahun lepas berbanding RM15.2 bilion pada 2012.

Dalam kenyataan, Persatuan Insurans Am Malaysia (PIAM) berkata pertumbuhan itu disumbangkan oleh pertumbuhan domestik yang agak kukuh, disokong oleh projek mega yang berterusan dan peningkatan kesedaran pengguna terhadap risiko peribadi dan perniagaan.

Sektor insurans motor berkembang sebanyak 7.8 peratus dalam premium kasar kepada RM7.5 bilion, sejajar dengan peningkatan bilangan kenderaan baharu berdaftar pada tahun itu, melebihi 655,793 unit.

Insurans kebakaran naik 8.6 peratus kepada RM2.79 bilion, manakala insurans kesihatan dan perubatan meningkat kepada RM912 juta.

Pengerusi PIAM Chua Seck Guan berkata walaupun pertumbuhan ekonomi sederhana, industri insurans am masih mampu mendapat manfaat daripada pertumbuhan pendapatan yang berterusan daripada pengguna kelas sederhana dan daripada peningkatan dalam domestik dan pelaburan langsung asing.

Mengenai masa hadapan, beliau berkata industri itu diunjurkan berada di laluan pengembangan yang kukuh pada tahun ini.

"Pertumbuhan akan disokong oleh permintaan domestik yang diunjurkan berkembang sebanyak 6.9 peratus pada tahun ini.

"Aliran menaik dalam inflasi Indeks Harga Pengguna turut dijangka memacu pertumbuhan organik berikutan pengguna mengkaji semula jumlah yang diinsuranskan untuk mengelak terkurang insurans," katanya.

Chua berkata liberalisasi sektor insurans akan menjadi cabaran kepada industri itu dan menjadi fokus pada tahun ini.

"Malaysia telah dikawal selia oleh tarif untuk motor dan kelas perniagaan kebakaran bagi tempoh tiga dekad lalu.

"Industri itu perlu meningkatkan fokusnya terhadap menaikkan prestasi taja jamin, meningkatkan

nisbah tuntutan kos, mengukuhkan produktiviti, mengurangkan kos pengambilalihan dan mengukuhkan perlindungan pengguna bagi membolehkan bersaing di pasaran terbuka," katanya.

-- BERNAMA

Copyright © 2014 BERNAMA

Source: <http://www.bernama.com/bernama/v7/bm/newsindex.php?id=1027163>